



TAPAK 8

Senate nung Trump temenden angutsü akok

TAPAK 7

Alimai kobi melii Covid anema takok angutsü: Harsh Vardhan

VOL. XVIII NO. 104 (ADOK 104) DIMAPUR

YANGTEPNÜ (THURSDAY) AENJETI (JANUARY) 28, 2021 ₹ 5.00

Jan 30 nü Chathe apu nungi Kukidolong lenmang lapoktsü

Dimapur, January 27 (TYO): Lenmang shibangtsüba January 30, 2021 nü Chathe River Bridge (Patkai Bridge) nungi Kukidolong shibangtsü ta taoba mapang osang metetdakja aliba agiener, ta Dimapur Deputy Commissioner Rajesh Soundararajan, IAS-i tanü metetdaksüogo.

Tanü State Task Force senden amentsü

Dimapur, January 27 (TYO): January 28, 2021 nü State Task Force senden ka amentsü, ta Principal Secretary Health & Family Welfare, Amardeep Singh Bhatia, IAS-i tanü metetdaksüogo.

COVID-19 vaccine agütsüba aser Polio atema National Immunization Day (NID)

onüktem benoka jembitsü atema iba senden ayonger.

Sendenji IDSP conference hall, Directorate of Health & Family Welfare, Nagaland Kohima nung nikongdang 2:00 ako nung amentsü. Anungji bangdakpurtem ajak arua adentsü mepishir, ta Principal Secretary, Amardeep-i ashi.

Aluyimertemi Parliament-i aotsüba sentong athi

New Delhi, January 27 (Agencies): Republic Day nung özüng alema mapa inyakba sülen Bodbarnü aluyimer teloktemi February 1, 2021 nü Parliament-i aotsü ayongba sentong thiogo.

"Martyrs' Day nung onoki India ajungalen aluyimertem tenüng nung lokti sentongtem agitsü. Onoki anogo ka lumitsü. Yashi atalokba ajanga February 1 nü onoki Parliament-i aotsü sentong renemba agiener" ta Bhartiya Kisan Union (R) tanishir Balbir S Rajewal-i ashi.

"Republic Day nung aluyimertemi tractor rally alidang özüng alema inyakba nung aluyimer tanishirtem dena liasü,"

ta tanü Delhi Police Commissioner S N Shrivastava-i metetdaksüogo.

Iba lendong nung public kiojen aika raksatsü aser police 394 yiru, ta paisa ashi.

Ozüng alema inyakba atema nisung 19 puogo aser 50 sota lir. Tractor rally alidang özüng alema inyakertem merenshitsü aser aluyimer tanishirtem dang asüngdangyatsü, ta Shrivastava-isa shisem.

Külen, aluyimer telok ana-Rashtriya Kisan Mazdoor Sangathan aser Bharatiya Kisan Union (Bhanu) teloktemi Bodbarnü Delhi artsülen lungkak aitba nungi pilaogo.

Centre-i February ita atema COVID-19 inyakyim latettsür

New Delhi, January 27 (Agencies): Union home ministry-i February 1 nungi 28 tashi Covid-19 mita reprangtsü, azüoktsü aser kümdanga alitsü indang inyakyim kar latetba metetdaksüogo.

Home Ministry-i state aser union territory sorkartem dang maparen balala nung Standard Operating Procedures (SOPs) benshitsü aser Covid atema inyakyim lateta aliba sülen anidaktsü atema tetuyuba agütsüogo.

Home ministry-isa nisung ajak atema swimming pools lapoktsü

aser cinema halls nung nisung timba mendaktsütsü melaogo. Ministry of Information & Broadcasting ajanga Standard Operating Procedures (SOPs) reprangshimba sülen metetdaksütsü ta parnoki ashi.

Tang tashi nung cinema hall aser theatre nung nisung 50% dang amentsü melar.

Arishi küm 65 temapur, temang nung timtem alirtem, mashisa tetsürtem aser arishi küm 10 teküpok tanurtem kanga kümdangtsüla, ta home ministry-isa nenshia metetdaksüogo.

"District magistrate ajaki nisung

o nisung tsüngda tepila ayutsüba mapa akangkanga inyaktsüla. Maneni, state sorkartemi Criminal Procedure Code (CrPC) nung Section 144 nung lateta alibatem benshitsü akok" ta MHA-isa metetdaksüogo.

Centre sorkarisa Civil Aviation Ministry dang Home Ministry den asüngdangteper international air travel talenba salatsü atema shiogo.

Home ministry-i 'containment zones' jungjunga latettsü aser item tesem nung inyakyim akangkanga benshitsü metetdaksüogo.

COVID Nagaland: Nisung 40 taneptsü angu

Dimapur, January 27 (TYO): Bodbarnü Nagaland nung COVID-19 aliba puteter dang nungibo taneptsü angur timba liasü.

Tanü nisung 40 tashi taneptsü angu aser parnok züngsema taneptsü angur ajak agi 11,796 kümogo.

"Bodbarnü nisung 2 dak COVID-19 aliba putet aser parnok züngsema nisung 12,803 kümogo.

Tang parnok 57 anepaludar" ta Health & Family Welfare Department Director, Dr. Denis Hangsing-i ashi.

Nagaland nung COVID-19 puteta alir nisung 88 süogo aser nisung 142 tanga state temi ogo, ta paisa ashi.

"Nisung 12,803 rongnung Traced Contacts 4,985, armed forces personnel 4,668, tanga state tem nungi arur 1,857 aser Frontline

Workers 573 lir" ta Dr Hangsing-isa metetdaksü.

"Tang anepalurtem rongnung nisung 11 dak shirangba yimya terara lir aser 2 oxygen güja anepaludar. Nisung 81 dakbo shirangba yimya kecha mali" ta paisa ashi.

Nagaland nung COVI-19 alitsü akok ta temolung melema bilemba sample 1,24,326 tendangogo.

NCD-i Naga Cemetery tasen atema metetdaksür

Dimapur, January 27 (TYO): January 27, 2021 nü Naga Council Dimapur (NCD) Councilor tem senden amendang Dimapur nung Naga Cemetery tasen atema inyakyimtem latetogo.

Tanü NCD Vice-President (Adm), Etsungmomo Kikon menden ser senden amen aser Peter Anal-i temoatsü meshia sarasadem.

Iba senden nung NCD Councilor 22 tashi aden aser Etsungmomo-i parnok ajak pelaa agizük.

NCD Councilor 30 nungi parnok nisung 6 temang majungba

aser koda masüba timtem ajuruba ajanga senden nung medentetba shiditem züluba senden nung adenertemi agizük.

Senden nung Cemetery tasen aser NCD küm 75 ajungba benjung indang onüktem benoka lemsatet. Iba mapang taoba mapang tasür ajak kasa aremtsü lateta aliba ama dang inyaktsü bangzüngtep.

Senden tembanga lokti sarasadem agi aser Naga Women Hoho Dimapur (NWHHD) President Sungsabeni Jamio-i sarasadem tembang.

Naga Cemetery tasenba atema telemtetbatem:

1. *Mang ka aremtsü atema 3 x 7 fts lemezüktsütsü.*
2. *Leperji ali nungi tsünglanglen feet 5 tuoka irr mang aremtsü.*
3. *Ground level (uniform) nungi feet 1 ajungketer leper yanglutsü.*
4. *Leper shia tetsüngda feet 1 ka ayutsü.*
5. *Leper meketa feet 1 plaster asütsüla.*
6. *Leper nung nüngshilungji 2 x 1 ½ ft tasazük dang asütsü.*

Tripura nung police-i lungkak aitba tesayurtem merenshi

Agartala, January 27 (Agencies): Bodbarnü Agartala nung Tripura Police-i lungkak aitba tesayurtem dak tenük amdaktsüba mozü aser tzü khaloktsüba den süng agi züka senshidaktsütsü merangdang nisung 40 tema yiru.

Lungkak aitba tesayurtemi taoba anogo 52 tashi Agartala City Centre nung mener lungkak aityonga arur.

Tanü police tenet tashi yiru aser lungkak aitertemi public gari asem raksatsü, ta Tripura Police-i ashi.

Tensa mejungi akümtsü akok ta bilemba agi West Tripura district ketdangsürtemi Mongulbarnü Agartala Municipal Corporation (AMC) nung Bodbarnep 6:00 ako nungi section 144 curfew alitsü özüng agütsü.

Tanep 5.30 ako meta police-i tesayurtem lungkak aitba tesemi orr tesayurtem apu. Police-i tesayur 300 tema apu.

"Mongulbarnü mapa nungi anenja aliba tesayur kari social media nung özüngi memelaba ama lungkak aittsü ta sangdong aser iba jagi tensa mejungi akümtsü akok ta asüba tangatetba aru" ta



Bodbarnü Agartala nung Chief Minister Biplab Kumar Deb'er ki anasa Tripura police aser lungkak aitertem raratepdang agiba noksa angur. (Agartala, January 27)

Inspector General of Police (Law and Order) Arindam Nath-i ashi.

"Tensa mejungi akümtsü akok ta bilemba agi onoki iba mapa ya inyak. Tanü police-i süng agi züka senshidaktsüdang tetsürtem dena tesayur aika yiruogo" ta paisa ashi.

Tanü lungkak aitertemi West Tripura Additional Superintendent of Police Shaswata Kumar aser

Sadar Sub Divisional Police Officer Chiranjib Chakraborty amak.

2010 küm mapa nung shimokba tesayur 10,323 tashi 2014 küm mapa nungi anentsü. Parnok mapa nung shimokba inyakyim nung metokmeperi lir ta Tripura High Court-i ashiba sülen mapa nungi anentsü.

Iba atema tesayurtem aser state

sorkari Special Leave Petitions benok aser 2017 küm Supreme Court-i High Court indang oshidang pusema nungit.

State sorkari ad hoc inyakyim nung March 2020 tashi tesayur 8,000 tema nem mapa inyakdaksü. Yaküm September ita Tripura Chief Minister Biplab Kumar Deb-i ita ana tsüngda tesayurtem indang

khuret atema mapa inyaktsütsü ta nangzüka liasü.

CM Deb-i nangzüka sülen ita ana lir, mapa nungi anentsüba tesayurtemi tentetba telok asem-Justice for 10323, All Tripura Ad Hoc Teachers Association aser Amra 10323 ka küma lokteper joint movement committee tentet.

Iba sülen yaküm December 7 nungi mapa nungi anentsüba tesayurtemi takhangba agüja Agartala nung timi lungkak aityonga arur.

Bodbarnü parnok rongnungi teshimtet telok kati Tripura Chief Minister Biplab Deb den ajurutepe senden amentsüba sentong liasü.

Tanep police-i inyakba mapa aija lungkak aitba tesayur telok ka Chief Minister'er kileni oa adenshi aser idangji police-i parnok senshidaktsütsü merang.

Ajisüaka, tesayurtemi tashi mangaba agi police-i tzü aser tenük amdaktsüba mokozi khaloktsü. Iba denji parnoki süng agi züka tesayurtem senshidaktsütsü merang. Iba lendong nung tesayur 41 yirur Govind Ballabh Panth (GBP) Hospital-i anir oa anepalu.

Mokokchung College of Teacher Education nung workshop agi



Mokokchung College of Teacher Education nung January 27, 2021 nü ananü atema Weaving, Bamboo Craft, Pottery & Beadwork nung workshop tenzükba anogo Dr. Akok Walling-i jembiba noksa nung angur.

Dimapur, Aenjeti/January 27 (TYO): Rajiv Gandhi Institute of Youth Development, (Programme for Development of North-East Youth through Higher Education Institutions) Ministry of Youth Affairs & Sports, Govt. of India ajanga sponsor süa, Mokokchung College of Teacher Education nung "Indigenous Livelihood Skills for Economic and Environmental Sustainability" omen kübok Weaving, Bamboo Craft, Pottery & Beadwork nung ananü (January 27-28, 2021) workshop tenzükogo. Iba sentong nung Prof.

Sibnath Deb, Director RGNID ya tongti tesemdang ama Google Meet ajanga o jembiba mapang Mokokchung College of School Education (MCTE) ajanga iba ama sentong ayongzükba atema pelaba lemsatep aser asenoki asen lisopur sobaliba wazüka ayutsü nungdaker, anungji iba ama workshop ayongzükba ajanga pei sobaliba wazüka ayutsü atema lanuputu ajungmesotsü, ta ashi.

Lisopur yimya nung takum liyonga aoba sempettem ajungkettsü asoshi asenoki professionalism, timi ketdangsüba aser tim lenmang

jangjatsü nungdaker aser kodang sobaliba, yimsü-yimpong aser lisopur inyakyim balala tem indang jembidir, mainland nung aliba nüburtemi north-east nüburtem nungi angazüksü jenti lir, ta pai ashi.

Iba sentong nung Dr. Akok Walling (Retired Principal, Dimapur Govt. College, Nagaland) tongti tesemdang liasü, shibai "Indigenous Livelihood Skills for Economic and Environmental Sustainability" onük nung ajemdaker jembi aser T. Alemla Longkumer, Principal, MCTE ajanga sentong nung adener pela agizüka liasü.

State kübok tesem balala nung 72 buba Republic Day amung

Dimapur, Aenjeti/January 27 (TYO): India linük ajunga den külemi Kiphire public ground nunga January 26, 2021 nü 72 buba Republic Day anogomung munga liasü, kong Advisor, Technical Education & Election, Medo Yokha tongti tesemdang liasü.

Iba sentong nung Advisor ajanga parade semdang aser linük indang nisan salaja Republic Day nungtem nung o jembia liasü.

Iba sentong nung parade contingent ya 7th Assam Rifle Kiphire, DEF police Kiphire, Phulungre Band party aser Village Guard Kiphire liasü.

Maneni district kübok department balalai exhibition stall amenoka aliba tongti tesemdangeri lapoktsü. Republic Day nungtem nung SBI Kiphire ajanga Shalom Children Home semdang, NSCB, Kiphire ajanga District Hospital semdang aser IRCS, Kiphire Branch ajanga district jail, Kiphire semdang liasü. Iba sentong ya metenzükdang sorkar office aser kakat reju ajunga nung linük nisang songa liasü. Tatamsa DEF, Kiphire ajanga 'beating of retreat' nung shilem agia sentong tembang.

Longleng: Longleng nung 72 buba Republic Day ya Public Ground, Longleng nung January 26, 2021 nü mungogo, kong Minister, Rural Development, Metsubo Jamir tongti tesemdang liasü.

Tongti tesemdangeri iba sentong nung jembiba mapang sorkar indang agency balalai takok anguba, inyaksangshiba

asentongtem indang shia liasü.

Medical aser health worker, frontline worker, police, SDRF & NDRF, Village Guards, Sanitation & Transport worker, district administration aser danga department tem aser ano arogo aser lokti tentet balalai pei akokba nung COVID-19 tashidak den raraba atema tongti tesemdangeri tenünsang agüja liasü.

Sentong tetenzüklen tongti tesemdangeri linük nisan salatsü aser DEF Longleng, 12th NAP (IR) Chingtok, Village Guard of Orangkong, Village Guard of Longleng Headquarter, Government Higher Secondary School Longleng aser Government Higher Secondary School (Students Police Cadet), Longleng nungi parade contingent tem den salute agia liasü.

Iba anogo Agri & Allied department, Medical, District Legal Authority aser SHG temi exhibition stall lapoka liasü. Sentong nung Soul Sisters ajanga temeja ken ka aten aser Pongo Union Longleng (tebur) aser High School ward Longleng (tetsür) temi sobaliba tsünsang sayu. Maneni district administration aser DEF Longleng teburtem tsüngta volleyball asaya aser tetsürtema Phomla Hoichem, Phenei Soti Club, LTSU aser LDVWVBA nungi volleyball asaya liasü.

Wokha: Wokha district nunga 72 buba Republic Day ya Wokha Local ground nung Advisor, Food & Civil Supplies, Legal Metrology & Consumer

Protection & Taxes, Phukayi tongti tesemdang sür munga liasü.

Iba sentong nung tongti tesemdangeri Ajato Odyuo (Chowkidar), Mammen E.V (So, E.E. Water resources), L. Chenithung Kikon (UBI-O/C Ralan), Renthungo Ezung (Dobashi Ralan), Longkumonen Pongen (Sub- Inspector), Dr. Mhanchan (Zonal Leprosy Officer), Obed Lotha (Chowkidar), Yanpvu Lotha (Constable-Driver), Erenbeni, Merilo Kikon, Asangla Tungoe, Chumchano Kikon, Julie Jungio, Mhabemo Lotha (Sub-Inspector), Zanthungo Tsopoe (Havildar 7th NAP), Benthungo Ngullie (UDA), Health Care Workers Ralan aser Department of Power, Bhandari nung nem District Level awards 2021 aser Commendation award tem agüja liasü.

Parade contingent ya Assistant Commandant, 7th NAP, Y. Ashito Aye-i anir liasü, kong telok pongui shilem agi.

Maneni iba anogomung nungtem nung DWO ajanga Mhondamo Memorial District Hospital semdang, SBI ajanga Dr. Motsuo Memorial District Hospital semdang, LRF ajanga 40th AR hospital aser DLSA ajanga tepuokdak alirtem semdang liasü.

Sentong nung Akuk Women Cultural troupe Wokha town ajanga sobaliba ken ka aten aser tongti tesemdangeri department aser Self Help Group temi amenokba stall tema lapokja liasü.

NSCN/GPRN (Reformation) ajanga Bushu Jiba salem abener

Dimapur, Aenjeti/January 27 (TYO): 'Bushu Jiba' benjongmung tenüng nung NSCN/GPRN (Reformation) ajanga Kachari/Dimasa nung den salem lemsatep, koba January ita tatemlen amunger aser Kachari/Dimasa kin atema tongtipang benjong ka lir, ta sangdong ka ajanga ashi.

Iba benjongmung ya anogo telatet ka mali saka anümeysi mapang ka nung, alu ruzüker jen sünga chiyongtsü bendena lia amunger.

Kacharis/Dimasas nung den maneni temoatsü liang aser Naga nung rongnung yimjung lenmang lepboker ka südakjang, ta sangdong ajangasa ashi.

Beth Shalom healthcare nung mapa inyak tenzükogo



Dimapur, Aenjeti/January 27 (TYO): Beth Shalom Diagnostics, Multispeciality and Research Centre atema Nagaland indang taoba Governor, BP Archarya-i nungshilong azüngtsür küm pongu anendaka lir, Minister, Higher Education and Tribal Affairs, Temjen Imna Along lenisüba kübok REM Group ajanga iba ki yanglu tenzüker.

Corporate Social Responsibility (CSR) nung shilem ka ama REM Group-i achayanga iba health centre atema meshitetba sentong ka January 27, 2021 nü agia liasü.

Iba healthcare centre ya sen crore aika jenjang project lir, kobai Mokokchung aser anasa aliba district tem nungi nüburtem nem healthcare service tajung agütsüsü.

REM Group nung Minister Temjen Imna Along Longkumer ya Chairman asüba mapang iba project ya tenzük, shibai district, talisa Tsürangkong, Japukong aser Jangpetkong nung healthcare facility tajung maliba atema teti khuret bona aru.

Iba sentong nung jembiba mapang, Moayimti nung modern healthcare centre ka

amenoktsü atema taoba Governor, BP Archarya-i lenmang sayuba indang bilemteta ashi. 2016 nungi 2021 tashi küm pongu anendakba ya Tsürangkong aser Nagaland nung aliba nüburtem nem modern healthcare centre ka agütsüsü asoshi REM Group nükjidong aliba asadangshitsü mapang ka liasü, ta pai ashi.

Nüburtem dang terenlok

maparen nung temolung

agütsüsü ayongzükba mapang,

COVID-19 mechi state

rongsenketsüng tsünglangleni

alur, anungji nüburtemi meranga

inyaktsüla aser ajak lungjemer

terenlok asoshi nokdaksüla, ta

Imna Along Longkumer-i

ayongzük.

Iba sentong nung ABAM

nungi S. Moa Aier ajanga tesem

ya meshiteta sarasademtsü

aser Moayimti village council

chairman ajanga tarur pela

agizükba o jembia liasü. Iba

sentong nung Tsürangkong aser

Japukong nungi yimtsüng

lenirtem, BJP Nagaland Mahila

Morcha, ST Morcha BJP

Mokokchung nungi ketdangsür

aser sorkar ketdangsürtem dena

liasü.

Toshi Wungtung-i Shiponger-Huhdangru lenmang lapoktsü

Dimapur, Aenjeti/January 27 (TYO): Dr. S.J. Akhum Executive Secretary YBBA ajanga bendanga agüja sarasademba sülen Advisor I & PR, SCERT, Village Guards, Toshi Wungtung ajanga January 27, 2021 nü Shiponger-Huhdangru indang kilometer 14 talang lenmang lapokja liasü. Iba lenmang ya Yimchungru Tribal Council tir Throngso aser pa den külemi

tenzükertemi anir yangluba lenmang ka lir.

Iba lenmang lapokba sentong agiba mapang YTC tiri Toshi Wungtung, Advisor, I&PR, SCERT, Village Guards; taoba Brigadier Sheron 7th Sector, Amit Thakur Commandant 45 AR; Alula Z. Thanso taoba YWO tir, YBBA staffs, Yimchungru Elite WhatsApp Blog aser temolungertem dang pelaba lemsatepa liasü.

Kusong nung school ki tasen ya semzükogo

Dimapur, Aenjeti/January 27 (TYO): Advisor, Prisons, Printing & Stationeries, H. Haiying ajanga Noklak district kübok Kusong yimtsüng nung Government Primary School ki tasen ka

January 27, 2021 nü semzüksü.

Iba sentong nung Deputy Commissioner, Noklak, Reny Wilfred, Village Council, GBs aser Kusong nung aliba nüburtem arua dena liasü.



NAGALAND HANDLOOM & HANDICRAFTS DEVELOPMENT CORPORATION LTD

(A Government of Nagaland Undertaking)
Dimapur : Nagaland

Cordially invites you to the
Special Handloom Expo

To be inaugurated by :
Shri. Miathou Krose
Chairman, NHHDC Ltd. Dimapur

On 28th January 2021 at 12:00 p.m
At Urban Haat, Dimapur

R.S.V.P
03862-224591/ 230046
Zakabo V. Rotokha (NCS)
Managing Director



SPONSORED BY:
Office of the Development Commissioner (Handlooms)
Ministry of Textiles, Govt. of India, New Delhi

Jorhat nung nisung 4 Brahmaputra ayong nung arakset



Bodbar anepdang NDRF telok kati Jorhat kübok Baghmora picnic tesem nung rong mekupoka araksetba tasumang pezü anguba sülen agiba noksa angur.

Jorhat, January 27 (Agencies): Bodbarnü Brahmaputra ayong nungi tanur ana dena nisung pezü indang tasumang ngutetogo. Bodbarnü Jorhat nungi kilometer 15 shi pila orr Baghmara nung picnic aoer nisung pezü Brahmaputra nung arakset.

Tasürtemji Razia Tikala (24), Sophia Chauhan (9), Sahil Chauhan (15) aser Rajiv Rai (30) nungertem liasü. Parnok ajak ya Jorhat district kübok Phansi Ali nung alirtem liasü. "Bodbarnü SDRF telok kati parnok indang mangtem ngutetogo" ta Pulibar Police

Station Office-in-Charge, Rubul Ali-i ashi.

Külen, Jorhat district Deputy Commissioner (DC), Roshni A Korati-i rong mekupokba lendong atema bushisüngdang asütsü atema tetuyuba agütsüogo.

West Circle officer Uday Shankar Dutta-i anogo 15 tsüngda bushisüngdang asüba sülen osang agütsütsü mapa lemezüksüogo.

Mongulbarnü Jorhat nungi picnic amongi aoer nisung 10 nungi 12 tashi rong ka nung Brahmaputra ajanga süidang mekupok.

Iba lendong nung rong anir aser tangartem kümzüik saka tanur ana dena nisung pezü samar bushitepba Bodbarnü angu.

Arunachal Pradesh sorkari district hospitals ajungkettsü

Guwahati, January 27 (Agencies): State sorkari district hospital ajak nung infrastructure renlokdahtsütsü atema mission balaka tenzükogo ta Arunachal Pradesh chief minister Pema Khandu-i Bodbarnü metetdaksü. CM Pema Khandu-i tanü ketdangsürtem den iba mapatong meyipa repringshiba senden ka amen. State sorkari Rs 400 crores

endoka district hospitals ajungkettsü atema sen endoktsü. Iba ajanga Arunachal Pradesh nung alirtem nem healthcare tajung agütsütsü, ta chief minister-i ashi.

Arunachal state sorkari tesüiba ita ishika tsüngda nurses 400, medical officers 66 aser specialist doctors 34 aniokogo. Iba ya sorkar mozü kitem nung nübo meperiba atema shimokba liasü.

"Arunachal sorkari district hospitals nung infrastructure ajungkettsü atema Rs 400 Crore mission tenzükogo. Tanü ketdangsürtem den health facilities tashi itdaksütsü atema senden ka menogo" ta Pema Khandu-i metetdaksü.

Arunachal sorkari shiranger ajak nem healthcare tajung agütsütsü atema tarutsü anogotem mozü kitem nung nübo talila anioktsü, ta paisa metetdaksü.

Mizoram nung heroin, cigarettes aser beer aika apu

Aizawl, January 27 (Agencies): Bodbarne Mizoram kübok Zemabawk Aizawl nung Assam Rifles sepaitemi sen aika alangba heroin, foreign cigarettes aser beer apu. AR sepaitemi nisung ana ket nung Rs 42 lakh alangba heroin, Rs 12,5000 thousand alangba foreign cigarettes aser Rs 36,000 alangba beer apu.

Assam Rifles sepaitemi heroin gram 107, foreign cigarettes 5000 packets aser beer 72 cans apu. Assam Rifles aser Excise and Narcotics department, Aizawl külem telok kati iba mapa inyak. "Mizoram nung aser talisa India-Myanmar arrtsülen mozü shibelenba ya tebilemtsü tulu ka lir" ta Assam Rifles-i metetdaksü.

Külen, Assam Rifles indang Serchhip Battalion-i Mizoram kübok Zokhawthar nung beer case 10 aser local liquor 140 packets apu.

Osang tejangja ka angazükba sülen Assam Rifles-i Champhai excise and narcotics department den yaritepba iba mapa inyak.

Tanü apuba beer indang jenjangji Rs 1,18,000 shi asütsü.

SÜR KÜM KA AJUNGBA BILEMTETER



ASÜR MRS. K. MERENLA (28-01-2020)

Tsüngrem den teti tatem makadak alitsü atema Pai na anir orr küm ka abensar. Na onok den meliakasa, temolung shirangseta asenok külemi liyonga aruba menungrar aser na onok molungjang nung teti alitsü.

Onoki na kanga longrar aser kangasa meimer.
Majurutep tashi salem.

- Nü temeim Kinungbu & Tanurtem

Northeast India nungi Padma award angurtem

Guwahati, January 27 (Agencies): Küm shia India Republic Day nung linük nung civilian awards tematiba-Padma awards agütsür.

Iba sempet ya telemsa asem-Padma Vibhushan, Padma Bhushan aser Padma Shri lir.

Taküm India Tiri Padma Awards 119 agütsür aser parnok rongnung nisung 15 ji Northeast India nungi lir.

Padma Shri

1. **Ms. Lakhimi Baruah** (Social Work) - Assam

A z ü n g t s ü - z ü l u t s ü memetetba tetsürtem ajungkettsü atema Lakhimi Baruah-i Konoklata Mahila Urban Cooperative Bank (KMUCB) tenzük.

2. **Gopiram Bargayn**

Burabhakat (Art) - Assam
Pa ya Assamese kentener ka lir aser NE nung sobaliba kentenbaren nung shilem aika agiogo.

3. **Bijoya Chakravarty**

(Public Affairs) - Assam
Lai 13 buba Lok Sabha nung Guwahati nungi MP inyak. Prime Minister Atal Bihari Vajpayee-i aniba sorkar nung lai Union Minister of State for Water Resources inyak.

4. **Ms. Sangkhumi**

Bualchhuak (Social Work) - Mizoram
Sangkhumi-i Mizo loktiliba nung terenlok aika bener aruogo aser talisa lai tetsürtem ajungkettsü atema inyaker.

5. **Ms. Radhe Devi (Art) - Manipur**

La ya Potloi Setpi (bridal wear designer) ka lir. Lai kiyimla 1,000 tema nem süoshi renejma semdaksüogo.

6. **Mangal Singh Hazowary**

(Literature and Education) - Assam
Pa ya Sahitya Academy angur ka lir aser Bodo kaketken o aser oshi atema inyaker.

7. **Ms. Anshu Jamsenpa**

(Sports)-Arunachal Pradesh
La ya Indian mountaineer ka lir aser season ka nung Mount Everest-i anaben tashi atulaji Anshu Jamsenpa lir.

8. **Dulal Manki (Art) - Assam**

Pa ya Assam nungi Jhumur

kentener ka lir aser arts nung shilem agiba atema Padma Shri award agütsütsü.

9. **Nanadro B Marak** (Others - Agriculture) - Meghalaya

Pa ya West Garo hills district nungi organic black pepper ayimer ka lir. Pai 1986 nungi iba mapa inyaka arur.

10. **Rewben Mashangva**

(Art) - Manipur

Rewben ya Manipur nungi Tangkhul Naga sobaliba kentener ka lir. Ministry of Tribal Affairs, Government of India-i pa nem National Tribal Award 2011-12 agütsüogo.

11. **Ms. Birubala Rabha**

(Social Work) - Assam

Lai Mission Birubala ta ser aransenba anema telok ka len anir. La ketdangsüba kübok Assam sorkari Prevention of and Protection from Witch Hunting Act, 2015 agizüka liasü.

12. **Satyaram Reang (Art) - Tripura**

Pa ya Hojagiri tsüingsang aser Kokborok ken nung mongin nisung ka lir. Pai Reang nung Hojagiri sobaliba tsüingsang wazüka ayur aser ajungketer.

13. **Roman Sarmah**

(Literature and Education - Journalism) - Assam

Pa ya shisashir, kaketzülur aser Gauhati High Court nung advocate ka lir. Roman-i tang küm 90 tain Assamese magazine, Bordoichila nung yimozülur mapa inyaker.

14. **Imran Shah (Literature and Education) - Assam**

Imran ya Indian Assamese oshi kaketzülur, sangro mejemer, novelist aser shisashir ka lir.

PADMA BHUSHAN

Tarun Gogoi

(Posthumous) for Public Affairs - Assam

Tarun Gogoi-i 2001 nungi 2016 tashi kümsük asem atongtepa Assam nung Congress sorkar len ania inyak. Yaküm November 23 nü pa Guwahati nung asü. Pa arishi küm 86 tain liasü.



TIR YIMYIM

YIMOBILEM (EDITORIAL)

DIMAPUR YANGTEPNÜ, AENJETI (JANUARY) 28, 2021

KEN O JEMBISHITSÜLA !

Taküm 2021 küm linük Republic Day amongba sentong nung Nagaland angh, R.N.Ravi-i jembidang, taoba küm 24 tashi Naga yimten tebilemtsü tatem kuma latettsü merangka melatetteti aruba ya nisung kari prangpong tashi amshia yimsü süa aruba yimya medoktsünüba agi lir ta metetdaksübaji angar odang yutsütsüla ken o bo masü. Ravi ya Naga nung asoshibo Nagaland angh dang nungi taoba, kechiyong pa ya center government o Naga yimten nüchiso bushir teloktem na tsüngda o tongdar lir. Aji oda, Naga yimten jenjang tasen ka latettsüba ya pa dak tashi tuluka keta lir, kechiyong pa ya center government tenüng nung Naga nungertem den jembitsü shimtetba lenir ka lir. Pa Naga yimten onük lemtepba nung shilem agidaktsütsü asoshi meshimdang, Intelligent Bureau nung tongti ketdangser inyaka liasü aser iba mapang nunga pa yabo Naga yimten nüchiso bushiba otsü metetba nisung ka liasü. Iba mapang pai ocet ka züluba nung Naga nung yimten nüchiso bushirtem jakla aser tia indang kanga mejungi zülüja lir. Iba ama nisung ka Naga yimten tebilemtsü latettsü atema center sorkari shimbaji aika atema meimlaba osang ka liasü, iba jagi tamasabo telok karibo Ravi ya Naga yimten tebilemtsü akoktsü indang jembiba maparen nung shilem agidaktsütsübo nunnganga liasü. Ajisüaka, pa tiyong ser India government o Naga yimten nüchiso bushirtem telok na tsüngda Naga yimten ken o jembia jembia, 2015 küm NSCN-IM telok o India government na tsüngda Framework Agreement ka renemba ajanga nisung ajaki Naga yimten tebilemtsü ken o tatem kuma jembitsü atema Ravi-i junga inyakdagi ta bilem. Atangji, Framework Agreement nung sign süteper file agütsütepa noksa nung anguba dak alaka, iba Framework Agreement nung kechisa zülua aliar shinga dang mesayu aser mashi, anungji nübortemibo kechi zülua aliar memeteti Framework Agreement agizüka ayu. Framework Agreement renemba atema tenüngsangbo agütsü saka kechi koma Agreement ka yangluar mangu aser memeteti mapang talangka aruba sülen, yaküm toang yimjak nung sayu saka nübortem dang meshii ayutsüsabo tongtibang onük kecha balaka zülua mali asü. Ibaji kechiba yimjak nung mesayui ayuar, tang tashi mangatetter. Naga nung Framework Agreement agizükertemi kechi bilemdaar ashitsü makok, saka iba nung jagi tenzüker Naga yimten tebilemtsü ken o tembanga jembitsüba ya anasai arur masü saka ano talangbaleniang aoer amai angur. Atangji, NSCN-IM telok dak alaka tanga Naga yimten nüchiso bushir teloktembo India government den ken o ajak tembanga jembir, joko, temeyong nemteptsüba dang atar amai angazüker. Ajisüaka, Naga yimten tebilemtsü ken o yabo ka dang, anungji telok ka den balaka aser ano telok ka den balaka ta telemtetba tapu ana agitsü makok, iba jagi telok ka dena, ka dena ken o tembanga mejembii atateper. Ibaji kanga shitak lir. Aji oda, tang Ravi jembiba ken o nung angatetba agi, pai telok tenüng tetshia meshiaka, pai mepelai jembibaji NSCN-IM telok indang jembir ta ajaki angatetter. Joko, aiben NSCN-IM telok o Ravi na tsüngda meputep adokbaji repringteta kumogo, anungji tangbo Naga yimten tebilemtsü akoktsüba dang nungibo Ravi o NSCN-IM na tsüngda meputep adoka aliba ken o ang tetsürokba aser tesashiba kumogo. Aji oda, Naga yimten ken o memenui tembangtsü atema teinyaktsü mapa ana dang lir, kaji R.N.Ravi melentsü mesüra Framework Agreement ano khen repringshitsü. Atangji, joko nisung melenba agibo Naga yimten tebilemtsü akoktsü ta asüba tangatetbabo aika dak mali saka asenok telok shia pei tangatetba melentsüla . Küm paikaya Naga yimten nüchiso asoshi raraaka, makok aser metembangtetba ya asenok tashitemetet aser rongsen nung anüngba agi masü saka tangatetba nung anüngba agi lir. Asenok shitakba Naga yimten nüchiso jenjang ka atema rarar süra asenokbo ali rongsen mebushili aser yimten nunga lenir asütsü meraktepli. Mahatma Gandhii India yimten nüchiso atema raradang, London nungi bener aruba suit aser necktie to magizük ser India nung nübortem nem akümstübudaktsütsü bilem asübo, mesüra rongsen bushia pa alitsüba ki tama asü asübo mesüra pa-ang mezüng ato kilonser akümstü merang asübo, British nungertemi India nung taliang mezüngmeshila. Joko, Ravii asenok ya yimten nüchiso masü saka prangpong amer pei agitsü rongsen bushir telok ta yimjak nung jembir. Atangji, rongsen yabo nisung tenük agi angur, anungji Ravii ashibaji tanganütsübo maket saka masüa ta a meshitet. Joko. Ravii Naga nung jakla aser tia ajak jungjunga metetogo, anungji pa denang ano khen Naga yimten jenjang ya asenoki aginüba ama jembishitsüa arogo lenirtemi, akhidang ama, shilem agi nunga jungdisü ta bilemer.

Sangro

TAREMZÜKER CHIBO

- C. Lima Ozüküm,
Mongsenyimti

Alimai sapuba chibo
Tajitettsü kecha mali
Boteper ben temeshi
Mezüja yanglutet
Atishitepdi süra
Eden tsüki den saku.

Ayaket kija kibong dangi
Menükshir sentsüket
Küptepshitep mesüdang
Ajak moko atur
Liteter lanu ain den
Na taremzüker chibo.

Küprakdaksür tenük
telen
Okilar temeden agütsü
Oshi oben nung
metsükdak
Taküm len anisang
Ne den loyu nungbo
Süa dokla yaseta.

Sametsa kü ain
makokdang
Kümrem sünema sotak
Keprangkeprua kümstü
Tarak keta yirutsü
Bonak teploktsüogo
Akseter kü mapa ngua.

Medongdakli
menübelang
Pok dak mamong
luladaktsür

Tim jilu, auyaba jagi
Shi, tanüla tepseter
Anemponga mera odi
Ajangzüktsü repa.

Meyushidi ajemalua
Atepshia renemdangdi
Lua arua yanglushira
Nüchi nüzüng
amongdang
Kiti ya-a perangshitsü
Tepela jangru tenzüktsü.

ALIMAI MAGINÜBA CHUBA TULU

- I. ZÜLU PONGNEN

O Corona Virus, Na chubatem
madak chuba,
Alima chubaibo pei lima sasep
nung dang chubar,
Mapang tataktet,
Alima yimli karbo tulu,
kar tila ka dang.

Alima chubatem yabo temzüng
Balala dak amendaker chubar,
Kar senmang nung chubar,
Karbo küm tataktet nung chubar.

Temzüngi melaba ama
President bo küm tezüngzük nung
chubar,
Ibai election ajanga shimteter,
America, Iran ano aika.

Democracy yimli nungbo lokti
Bangzüng madak Prime Minister-i
chubar,
Parnokbo küm pungo
asoshi dang,
Ano kokra tanabuba – tasembuba
tashi chubatsü akok.

Saka O Corona,
nabo shingai memetet,
Alimai na meshimtet, onok
rongnung yimsüsütsüsa,
Na ya China lima nungi aru ta
alimai jembir,
Tashitak tulu bener tammang
chuba ka aru alimai.

Tanga tashitak wara aika lir, tulu
tila aika,
Kecha tashitak wara-ia nisung
madak yimsü masür,
Saka O Corona, naibo alima
chubatem madak
Aser calima nübur ajak madak
yimsü asür.

Shingaia ne nem tashi magütsü,
Saka naibo Municipal madaka
yimsü asür.
Alima chuba tulu-tila ajak nai
amokbanger,
Aser item ajak madak nai
yimsü asür.

Nai mapayui nisung tepseter,
timtemdaktsür,
Shishilembar karbo ludaktsür,
karbo tudaktsür,
Nai ajungketsüba oset jenjang ya
Alima yimsüsür sorkaria
nemtemtsü makoker.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazüngerü angateta agitsü mepishir**

Hindu hungeri azükba agi Khristan tsür mashisa ka tanur raksa



Madhya Pradesh kübok Indore nung Tenla ki tejentiba- White Church noksa nung angur. Iba Tenla ki ya 1858 küm Governor General of India, Sir Robert M C Hamilton-i yanglua liasü.

January 27, 2021: Madhya Pradesh state nung Hindu yimsü alia amanger telok kati Khristan tsür ka dak azükba agi la tebok nung bena aliba tanur süadok, ta International Christian Concern (ICC) osang ajanga metetdaksü. Ajisüaka aibelenertem jagi, Hindu hunger Khristan tamangba yimsü dangi meyipdaksüba nung lai-a shilem agia lir, ta ashi. December 31, 2020 nü Hindu yimsü alia amangertemi Madhya

Pradesh kübok Bhevda yimdak Khristantem tekülem sentong tagidak mapang nung timtem agütsü. Parnoki Tenla ki telung jagi aiba sülen Khristantem dak azük. Khristantem rongnungji Leela Bhai aser la kinüngbu, Rakesh na desnema liasü. La ita 8 tanur tebok nung bena liasü; la mashisa liaka Hindu hunger jagi la dak-a azük. Hindu hunger jagi la dak tebok nunga metsüa liasü, anungji la tebok nung tashitsü atua tanur tasü aso, ta kasa

osang ajanga metetdaksü. Khristantem amakba anema January 6, 2021 nü Khristantemi Tikari police station kima adenshir longkak aita police dang aibelenertemji pua tapet temerenshi agüjang, ta takhangba agütsü. Madhya Pradesh state sorkari anti-conversion özüng tesashiba ka benoktsü, ta sangdongba mapang nungi tenzüka state nung Khristantem anema inyakba kanga bulua kümogo.

India nung Arogo lenirtemi aluyimertemi akhangba pusemer

New Delhi, Aenjeti/January 27, 2021 (Agencies): January 26, 2021 nü New Delhi nung police aser aluyimertem na tsüngda raradang aluyimer ka asüba aser nisung 80 dak tema yiruba tatalokba Arogo lenirtemi aitsüogo. New Delhi nung India hunger 72buba Republic Day anogomong nung tensa mazüokteti Income Tax Office aser Red Fort anasa aluyimertem aser police na tsüngda rara adoka liasü; aluyimertem pakshidaksütsü atema police-i ajok aser tear gas amshi. UCA den jembidang Indian bishops' Office for Labor Secretary, putir Eugene Perera-i, "Onoki longkak aitba aluyimertem pusemer aser longkak aitba mapang asür aluyimer kibong den mangyim jashi lemsateper. Aluyimertemi özüng tasen asem agientsü atema akhangbaji onoki pusemer," ta metetdaksü. "Aluyimer ka asüba aser police densema nisung aika yiruba atema onoki sasar aser rara adokbaji onoki aitsür. Ketdangsertem kanga kümküma lira tensa meraksai lila," ta putirisa metetdaksü. Yaküm September ita nung orkari agizükba aluyimba

özüngtem anema aluyimertemi tesüiba ita ana tashi longkak aita arudar. Hindu pusemba party BJP-i ashiba agi, Farmers' Produce Trade and Commerce (Promotion and Facilitation) Bill, 2020 aser Farmers (Empowerment and Protection) Agreement of Price Assurance & Farm Services Bill, 2020 ajanga aluyimba sector tajungba akümtsü. Bodhbarnü osangbenertem den jembidang Delhi police-i, telemtetba agia aliba ama masü saka aluyimertemi tractor rally ji kanga keraa tenzüka linük yimtiba telungi ait, ta metetdaksü. Police-isa, longkak aitertemi lemteta alibatem anema inyak aser Singhu, Gazipur den Tikri arrtsülen nungi linük telungi aitba dang masü saka aluyimer kar ket nungbo noklang nok bena liasü, ta metetdaksü. Parnok Income Tax Office intersection tonga aruba sülen Red tsütsüleni aotsü merangba mapang nung police den rara aser süng den insang amshia police dak azük, ta police-i metetdaksü. Aluyimertemi parnok indang tractors agi gari aika raksatsü. Red Fort atongba sülen aluyimertemji

tenokdangba aliba tesem tonga aruba sülen parnok parnok indang wako sala. Arogo lenirtemi dang masü saka party balala nungi lenirtemia iba tatalokba aitsüogo. Congress party lenir aser Punjab Chief Minister, Amarinder Singh-ibo aluyimertem dang arrtsüleni tanaben meyipa oang, ta mepishia liasü. West Bengal Chief Minister aser Trinamool Congress tongti, Mamata Banerjee-i, iba tatalokba ajanga la kanga jashir, ta shia sorkari aluyimertem atema mebilemtsür, ta sorkar aitsü. Laisa sorkar dang aluyimba dak sendakba özüng tasen ajakji agienang, ta takhangba agütsü. Taoba mapang Farm Minister, Sharad Pawar-i, "Aluyimertem tesünep nungdang longkak aita liasü, saka parnok jashidaksübaji kechi ajanga ta shisadangtsüji sorkar mapa," ta ashi. Nütsüng billion 1.3 aliba linük nung nütsüng shilem 70 bo taküm alitsü atema aluyimba nungdang metaloka lir. Aluyimertem shilem 80 (million 700 dak tema) bo tilateri aluyimertem lir, parnok aika ali hectare 2 den tajemba lir.

ANOGO ABEN TSÜNGREM DEN

Tsüngrem nenok dangi shiba yoker? Mathi 17: 16-17

Temenen tanelatem aritoktsür taneptsüba sayatenya mapa inyaktsü asoshi Yisui nütsüngtem nem ain agütsü (Matt. 10:8). Nübur tenzüksü asoshi Yisui parnok nem tashi agütsü, saka parnok pei atema dang bilem nung Tsüngrem ain samatok. Kodang teben kati pa jabaso ka yareta shiranga aliba anebtsütsü asoshi yok parnok kanga mejungi tamakok angu. Parnoki temaba menden atema kanga sükshia bilem (Mark 9:32-35) anungji Tsüngremi parnok ajanga kechi inyakdaksütsü iba nükrangji metongtet. Yisui Pa nütsüngtem dang o teküprak agi langzü. Pai parnok dang mamanger aser tekirak ta aja, aser parnok den kopiga aremzüksü! Kechiba? Kechiaser tangar nem tekümtet agütsüba mapa nung Pa den inyaktsüba liasü, saka parnok pa den angatettepa mali nung tanelaren parnok ain makai aküm, shirnok dangi Tsüngremi parnok yok parnok nem temang aser tanela nung tesünep magütsütet. Yirua alirtem dangi Tsüngremi yoker aser parnok yaritsü Tsüngremi asenok nungi yimlar. Nütsüngtem amaji asenoki asen tejangraba nung kanga temulung agütsüba ajanga Tsüngremi asenok shirnok dangi yok parnok nüngdak nung asenoki meyaritetter. Yimsü mapa nung asenoki kanga shilem agir saka asenoki shinga dang meyaritettsü akok. Tsüngremi shirnok dangi na yok parnok dang tamang kokteta ali asü masü anogo shia maneni ne taküm bushia reprangshitsü nüngdak.

Burkina Faso nung puer aoba putir, Sanon tasü mang nguogo

January 27, 2021: Tawa 2015 küm nungi tenzüka Africa kübok Burkina Faso item ama rara ajanga nisung nung mejangjaba telok kati putir 11,00 dak tema süogo aser ka puer aoba sülen pa nisung million 1 dak tema tasü mangji Jihad kiralongrartem jenshiogo, ta 2019 küm U.S. bulua aliba tesem ka nung State Department-i metetdakja nguogo. Burkina Faso nung putir, Alima nung Khristantem Rodrigue Sanon samaba sülen tamajungtiba reshikangshiba anogo ana lir pa tasü mangji linüktem tarensen nung anasa aliba arem ka nung angu, Burkina Faso ya jenjang ta Banfora nung aliba Arogoi 32buba nung lir (Open Doors sangdong ka nung metetdaksü. USA's World Watch List). Putir, Lucas Kalfa Sanou-i, Open Doors-i ashiba agi, "January 21 nü Banfora nungi tang Burkina Faso nung kilometer 20 shi pilar arem ka internally displaced persons nung putir Rodrigue Sanon (IDPs) million 1 dak tema lir, tasü mang nguogo," aser parnok timbaka metetdaksü. Khristantem lir. Notre Dame de Kiralongrartemi yimtsüngtem Soubaganyedougou nungi putir, amakba ajanga nisung aika Sanon Mongolbarnü (January jenshia parnok timbaka 19) putir ka ajurui Banfora-i refugee camps nung jenoka aoba mapang nung sama. Pa alir. indang gari lenmang nung angu Yaküm June ita nunga saka pabo maliasü. Islamic kiralongrartemi Putir, Lucas Kalfa Sanou-i, amakdang Burkina Faso nung "Tsüngrem taochi ajanga Pa (tatalokba asem) tanur kilir, Rodrigue Sanon tanela densema nisung 58 asü. tesünep nungi 2019 küm December ita anisüngzükdakjang," ta nunga Niger arrtsülen lemsateper. kiralongrartemi Hantoukoura Tesüiba küm pongu tashi jila nung Protestant Arogo tenla kiralongrar telok balalai kidang Khristantem amakdang Khristantem anema inyaka nisung 14 asü. arudar. Item kiralongrar telok Kasa küm nungjisa April ita rongnung Group for the Support nung Silgadji jila nung tekülem for Islam & Muslims, Islamic sentong temer senshidang State aser Ansarul Islam kiralongrartemi Protestant pastor ka den Khristan pongu densema lir. khaseta liasü.

OLONG PAITEP # 5707

1				2				3		4
5		6								
							7			
8										
										9
		10				11				
				12				13		
14										
						15				
16										

TIPIEN

2. Auo nung chiyongtsü asenba - (7)
 5. Mangyimba mapang - (5)
 7. O tamendakdak - (4)
 8. Pei dak malangba - (7)
 10. Juli - (7)
 12. Sen ayudak - (7)
 14. Tenük agi ajitet - (4)
 15. Tamajung aküm - (5)
 16. Apuso - (7)

LANGTSÜNGLEN

1. Lenmang - (7)
 2. Aor kidong ka tenüng - (6)
 3. Tenarong maten - (6)
 4. A _ _ _ g - (3)
 6. Mopung apodoka - (3)
 9. Tongtipang tagitsü - (7)
 10. Menungra bilem - (6)
 11. Aiür - (6)
 13. S _ _ _ k - (3)
 14. T _ _ _ r - (3)

OLONG PAITEP # 5706 TELANGZÜBA

TIPIEN :

1. Yiar, 3. Tesola, 7. Yimra,
 8. Tangar, 9. Peria, 10. Tanur,
 11. Tasen, 13. Lemjem, 15. Tambu,
 16. Khuret, 17. Sang.

LANGTSÜNGLEN :

1. Yimti, 2. Amen, 4. Shiner, 5. Alaka,
 6. Satan, 9. Putet, 10. Tembar,
 11. Tatok, 12. Amang, 14. Jala.



ALOKBA TENDANGER :

Tetendanger : Alokba langzüang,ajak langzütetra temabai atutsü.
 General holiday timba alibaji koba küm?

Alokba : 2020 küm adi.

Tetendanger : Arogoi tetsubutibaji kechi?

Alokba : Covid19 ya, serang Tsüngrem,

Tetendanger : Temang nung tebelemtibaji koba shilem?

Alokba : Tenarong ya lir, kechiba süra pa dak tenük aina
 yiloktsüla,koranga metaloktsüla,masks
 yiloktsüla,naroa anutsüla, tangashia angashitsüla ano
 tebura jungtsütsüla.

Tetendanger : Taküm aliba rongji kechi?

Alokba : Padak ya lir,

Tetendanger : Süra, nisungi nisung sempabaji kechiba?

Alokba : Kasadang asüba agi kechiba süra kati ka den temaba
 kümner.

Tetendanger : ALOK,na temabai tuogo?

Lilir: I. Kilang Ajem, Indisen,Dimapur

TANÜBO NAI LANGZÜANG

Q. 'Exercise Desert Knight 21' indang tesem koba yimti nung lir ?

a. Andaman and Nicobar Islands

b. Goa

c. Jodhpur

d. Kolkata

===== (Taruba adok nung onoki langzütsü)

YASHI ADOK TELANGZÜBA : UN



Tanur asoba anogo nung salem osang den noksa
 angati adokdaksünura - Tenüng, Küm, School,
 Talidak & salem osang tejangja zülur, noksa
 (photograph - any size) ka den anogo 3 mesüra 4
 jelia e-mail : tiryimim@gmail.com nung yokang
 mesüra Tir Yimyim bureau tem nung agüjang.

Tepela
 Tasoba Anogo



1. Tenüng :
 2. Tasoba anogo:
 3. Küm : 4. Class :
 5. School :
 6. Talidak :
 7. Salem osang :

NAI-A YA METETTER MA?

REPUBLIC DAY, 2021 NUNG SEMPET TAPU BALALA

YAMAI AGÜJA LIASÜ :

- * Padma Awards
- * President's Police Medal for Distinguished Service
- * President's Police Medal for Gallantry
- * Police Medal for Meritorious Service
- * Force Wise/State Wise Medal Awardees
- * Correctional Services Medal
- * Pradhan Mantri Rashtriya Bal Puraskar
- * President's Fire Service Medal for Gallantry
- * President's Home Guards & Civil Defence Medal for Distinguished Service
- * Jeevan Raksha Padak Awards

SUDOKU # 5748

TELANGZUBA # 5747

4	5		7	1		3			4	9	7	6	3	2	1	8	5
2	1	7		8	3	9		4	6	1	8	5	7	9	2	3	4
6	3			4	5			2	5	3	2	8	4	1	7	9	6
5		4	1	3	7			6	2	5	9	3	8	6	4	1	7
	2	1	4		9				7	6	1	9	2	4	8	5	3
			5				3		8	4	3	1	5	7	6	2	9
	7	3	2			8	4	9	3	2	6	7	1	5	9	4	8
	6	5				1			9	8	4	2	6	3	5	7	1
			3			6			1	7	5	4	9	8	3	6	2

OJANG LUTEP # 5295

- MULTEUNG :
 LETEMTBA :
 SUNNIGJI :
 ANGKODA :
 GARTANI :
 HIÜNGMMEZES :
 MTSASÜÜ :
 SEAR :
 MIÜNGTSREA :
 IMEMER :

OJANG LUTEP TELANGZÜBA # 5294

TEMZÜNGI AIBELENERJI BUSHIA MAOER SAKA AIBELENERJI TEMZÜNG
 KÜBOKI AITDANG AITSÜR

TAN HOPTA ATEMA - KOMA SÜLA ?

Q. Nagaland nung ya Assembly constituency 40 dang aküm nunga süla ?

Olong 20 shi nung January 20, 2021 tashi nung iba telangzüba ya onok dangi (e-mail - tiryimim@gmail.com) :
 (SMS - 9856121232 / 9436072422) : (WhatsApp - 7005723372 / 8729995804) : (tiryimim.in) ajanga yokang. Telangzübatemji taruba Honibarnü adoktsütsü.



Chennai, January 27, 2021: Bodhbarnü Chennai nung taoba mapang Tamil Nadu nung Chief Minister, Jayalalithaa memorial semzükba sentong nung adentsü atema lokti adenshidang tangokba noksa nung angur. Iba memorial ya Tamil Nadu Chief Minister, Edappadi K Palaniswami-i semzüktsüogo.

Tractor rally nung rara adokba ken o nung Police-i nisung 200 puogo

New Delhi, Aenjeti/January 27 (Agencies): Mongolbarnü New Delhi nung aluyimertem tractor rally agiba mapang nung rara adokba dak sendakba nung Delhi police-i nisung 200 puogo, ta Bodhbarnü police-i metetdaksü.

Mongolbarnü Delhi tesem balala nung rara adokba dak sendakba nung FIR ajak agi 22 benokogo, ta parnokisa metetdaksü.

IPC Sec 395, 397, 120, IPC Sec 395, 397 aser 120 nung ajemdaker FIR benok aser item ken o ya Crime Branch-i bushisüngdangtsü, ta Delhi Police-i ashi.

"Yashi aluyimertem longkak aitba mapang nung Red Fort nung rara adokba dak sendakba nung FIR benokogo. Iba tatalokba ya Delhi Police Crime Branch-i bushisüngdangtsü," ta

Police-i ashi.

Mongolbarnü rara adokba sülen police-i Bodhbarnüa yimti nung tensa asadangogo.

"Mongolbarnü rara adokba mapang nung ITO nung Additional DCP Central operator noklangnok agi yiruja liasü. Iba rara nung longkak aiter aluyimertemi police 300 dak tema yirutsüogo," ta Delhi police-isa metetdaksü.

ITO nung rara adokba dak sendakba nung IP Police Station nunga FIR ka benokogo, aser tang tashi nung FIR ajak senteper 22 benokogo.

Yashi longkak aiterem telok ka Red Fort-i arua aluyimertem indang wako salaba sülen security tali lezmükja liasü. Aluyimertemi Delhi telungi aitsü atema tenokdangba atsü raksatsüba sülen nija aser sorkar indang kiojen aika

raksatsüba ajanga takoksa kanga nguogo.

Centre sorkari benokba aluyimba ozüing asem anema aluyimertemi Republic Day anogomong nung Kisan tractor rally ayongzüka agiba mapang nung rara adok.

November 26, 2020 nungi tenzüka Punjab, Haryana, Maharashtra aser Uttar Pradesh densema state aika nungi aluyimertem Delhi arrtsülen adenshia aluyimba ozüing asem anema longkak aiter. Aluyimertemi sorkar dang Farmers` Produce Trade and Commerce (Promotion and Facilitation) Act, 2020; Farmers Empowerment and Protection) Agreement on Price Assurance & farm Services Act 2020 aser Essential Commodities (Amendment) Act, 2020 ozüingtem agienang ta takhangba agüja longkak aiter.

Odisha nung Healthcare Worker ka Covid vaccine agiba sülen asü

Bhubaneswar, January 27 (Agencies): Odisha nung Sambalpur district kübok Burla nung arrshi küm 27 healthcare worker ka coronavirus vaccine agiba sülen anogo asem lir süogo, ajisüaka sorkaribo paji vaccine agiba agi asüba masü, ta metetdaksü.

Bodhbarnüsa Odisha nung cornavirus vaccine agir ana dak temang nung timtem adoka liasü.

January 23, 2021 nü health worker sangji coronavirus

vaccine agiba sülen Burla nung aliba Veer Surendra Sai Institute of Medical Sciences & Research (VIMSAR) nung asü, ta ketdangsertem osang ka ajanga metetdaksü.

"Tanep Nuapada district nungi arrshi küm 27 tebur ka VIMSAR, Burla nung süogo; pa dak Bleeding Disorder den Severe Anemia aser Intracerebral Haemorrhage putet. 23.01.2021 nü pa coronavirus vaccine agia liasü," ta Bodhbarnü Health & Family

Welfare department-i sangdong ka ajanga metetdaksü.

"Ajisüaka mezüingbuba medical bushisüngdang ajangabo pa asübaji coronavirus vaccine den sendaktepa mali ta bushitetogo," ta kasa sangdong nung shia lir.

Odisha nung Hombar tashi nung healthcare workers 1,77,090 coronavirus vaccine agiogo aser tanabuba shilem nung nisung 1,73,636 vaccine agitsü.

Alimai kobi melii Covid anema takok angutsü: Harsh Vardhan

New Delhi, January 27 (Agencies): Alima linüktemi coronavirus wara anema longjemer asalentong yanglua inyakba ajanga iba wara anema takok angutsü mapang ana nung lir, ta India Union health minister, Harsh Vardhan-i metetdaksü.

148buba WHO Executive Board (virtual) senden nung jembidang India Health Minister-i, "Linük balala nung iba wara agi kongshiba jenjang balala süaka züingsem linüktemi meranga inyakba atema pelar. Linüktem amalitepa asalentong yanglur inyakba ajanga asenoki kobi melii iba wara anema tongbang akoktsü," ta metetdaksü.

2020 küm coronavirus wara agi alima tesem ajak kongshiba dak sendakba nung pai, "2020 ya science küm ka liasü aser coronavirus wara mapang nung meimchirtemi temeim mapatem aika inyakogo. Alima nung scientist temi shisa lemsatapa longjemer inyaksüsa tensai bener arutsü. Iba atemaji sorkartem, shishilembartem aser tenla agütsüba organisations ajak longjemer teyari agütsü," ta metetdaksü.

Alima nung Covid-19 anema raratsü atema meranga inyakba dak sendakba nung Harsh Vardhan-i, "Tayongzükbatem koktettsü aser healthcare services tajungtiba agütsütsü atema züingsem linüktemi akokba tashi meranga inyakdar. Ajisüaka ano mapa metembang, anungji iba wara koktettsü atema ano asentenshir meranga inyaksüla," ta ayongzüka.

"Tesem ajak kümzüka mali tashibo tesem kecha kümzüka mali. WHO nung onoki low aser middle-income linüktem nung Covid-19 tests agitsü, treatment aser vaccine agütsütsü atema bangjemogo," ta pai metetdaksü.

"Covid wara sülen alima nung tayongzükbatem alitsü. Item tayongzüka koktettsü atema WHO ya walunir asütsüla aser züingsem linüktem nung health care systems ajungkettsütsü atema inyaksüla," ta paisa ashi.

Bodhbar tashi nung alima nung Covid-19 case million 100 jungogo aser iba wara agi tamajungtiba kongshiba linükji United States (25,407,414) lir.



Hyderabad, January 27 2021: Bodhbarnü Hyderabad nung International Customs Day amongdang Telangana Angh, Dr. Tamilisai Soundararajan-i coronavirus tongbang nung nokdakertem nem sempet agütsüba noksa nung angur.

AIADMK lenir, Sasikala küm pezü jail nung ayuba sülen chiokogo

Chennai, January 27 (Agencies): Pei dak mapet rongsen jenti bendenba ken o nung 2017 küm V K Sasikala aitsüba sülen la küm pezü tepuokdak abensar Bodhbarnü la Bengaluru Jail nungi chiokogo, ta Bengaluru nung ketdangsertemi metetdaksü.

Sashikala ya taoba mapang Tamil Nadu chief minister asür, J Jayalalithaa den kanga atongsema inyakker ka liasü.

Sasikala Victoria Hospital nung tang Covid-19 treatment tagidak lia la chiokba inakyim ajak inyak. Hopta ka tejaklen la dak coronavirus putet. Bodhbarnü la pusemertem aika Victoria Hospital kima adenshia benjungtep aser nanglong lemja liasü.

La dak mapet la ket nung sen crore 66 jenjang rongsen aliba ken o nung la den lar adianu kinüngtsü, J Ilavarasi



V K Sasikala

aser Jayalalithaa'er jabaso V N Sudhakaran nunger küm pezü tashi tepuokdak ayutsü atema 2017 küm February ita nung court kati obendang agüja liasü.

La Chennai yimtii aruba sülen lai joko taoba mapang Chief Minister'er ki 'Veda Nilayam'-i moutettsü, kechiyong state sorkari iba kiojen agia iba ki ya memorial kuma yanglur semzükogo.



New Delhi, January 27, 2021: Bodhbarnü New Delhi nung aliba National War Memorial nung Bangladesh Armed Forces sepaitemi asürtem nem akhüm agütsüba noksa nung angur. January 26 nü India nunger Republic Day parade nung Bangladesh Contingent-ia shilem agia liasü.



Myanmar yimtiba, Naypyitaw nung aliba mozüki ka nung inyaker nem COVID-19 mozü agütsüba mapang Myanmar lenir Aung San Suu Kyi-i semdangba noksa nung angur. India nungi mozü mezüngbuba bener arur anogo pongu dang lir Myanmar nung Bodharnü iba vaccination sentong tenzükba mapang health worker tem mezüng agiogo.

Lebanon nung lockdown anema longkak aiter aika yiru

Tripoli, Aenjeti/January 27 (Agencies): Northern Lebanon nung security forces aser coronavirus lockdown ajanga jashir longkak aiter tsüngta Mongulbar aonung rongrong adoka nisung 45 yiru, ta Lebanese Red Cross ajanga ashi.

Tripoli yimti nung rongrong adokba sülen nisung teku mozüki nung anepalua liasü, ta Red Cross-i Bodhbarnü ashi.

Longkak aiter temi sorkar office tem nung long agi aon aser main square ka mokdanga liasü.

Ki-o-jen raksatsü azüoktsü atema army yok, kechiaser longkak aitba tesem nung gari anena alidak mi senloksü, ta Lebanon indang National News Agency ajanga ashi.

Coronavirus mechi

tenokdangba tesashi benokba tejashi nung Hombar aonunga Tripoli nung rongrong adoka nisung 30 shi yirua liasü.

Coronavirus tashidak wara ya metenzük dang yongi Lebanon nung Tripoli ya tesensaktiba tesem ka liasü, kong rongsenketsüng tsütsü timtem balala ajuru.

COVID-19 tashidak wara sashia akumba azüoktsü aser shirangertemi mozüki asünga ajemdaktsütsü asoshi ita tetenzüklen Lebanon-i Tripoli nung lockdown benokba yong yangji alir aika senotsü tarulen mali akum.

Taoba hopta ketdangsürtemi lockdown ya hopta ana atsülangtsü, aser ibaji ajanga anogoshi aayanger aser makamaiter tem tali

jashidaktsü.

Taoba mapang lockdown asemben benokdang sorkari nüburtem nem senotsü teyari agüja liasü. Iba mapang ya ketdangsürtemi kibong 230,000 nem ita shia sen \$47 agütsü, aser iba yagi parnok meperir, ta shia liasü.

Saka tang benoka aliba lockdown mapang senotsü teyari agüja mali.

Linük tesem ajungalen anogo tepiyong curfew benoka lir aser aonsotsü lijaliyongba ya home delivery südaktsü, koba tajemzükba tia nung aliba tesemtem nung aiben mangur.

Iba linük nung nütsüng yongsük shilem 50 dak tema poverty line kübok alir, ta United Nation ajanga asadangteta lir.

Senate nung Trump temenden angutsü akok

Washington, Aenjeti/January 27 (Agencies): Taoba US Tir Donald Trump ya impeachment trail nung temeden angutsü amai lir, kechiaser Democrats temi nüngdakba ama Republican Senator tem teyari mongutet. Sorkar anema nüburtem nokdaktsü atema ajungmesoba ken o nung Democrats temi House nung Trump aitsü aser Senate nung aitsütsü atema vote shilem asem lemdanger ana nüngdaker. Menden 100 aliba Senate nung tang Democrats aser Republican züngsem 50-50 lir.

Shime asem nungi ana ngutettsü atema Democrats temi Republican Senator tajemba agi 17 vote nüngdaker. Tir menden yutsür ken o benoka jembiba US tir tem rongnung Trump ya mezüngbuba alitsü. Aser küm ka shi tsüngta Senate nung temenden agütsüba tan yagi tanaben alitsü.

Nenoki 17 angutsü teimla ni mangur. Ibai tentangba vote ka dang südi ta ni bilemer, ta Republican Senator 50 nungi 45-i iba ken o anema vote agütsüba sülen Republican Senator John Boozman-i ashi.

House ajanga article of impeachment ya Senate nem Hombar aonung agütsü. "Trump aitsütsü ken o

atema Senate nung mapang meindoktsüla. Taoba tir ka aitsütsü atema constitution nung tejangja totuyuba agüja mali, aser aji aliyonga, aji amshitsü mapang masü. Ni taoba mapanga nenshia shiogo, Tir Trump-i January 6 nü jembiba o ya tesepra aser shisa junga magitep jembiba lir, saka pa aitsütsü atema constitutional standard agi matonger ta ni amanger," ta Republican Senator Kevin Cramer-i ashi.

Senate Majority Leader Chuck Schumer-ibo Trump ya office yutsür oaka pa aitsütettsü akok, ta ashir. United States indang tiri aibelenba rongnung taoba Tir Trump aibelen ya tamajungtiba lir, ta pai ashi.

Taoba küm November 3 US tir election nung Joe Biden-i takok nguogo ta yimten yimsüsürtemi kuli agütsütsü adenshia lia Trump busemertemi US Capitol senbanga ki telungi ayi aser ki-o-jen raksaja sorkar inyakyim khen anena ata. Tir election nung Trump-i tamakok anguba magizüktet aser kuli tejangja magütsüteti election nung ashikülak mapa inyakogo, ta aitsü aser January 6 nü pa busemertem den jembiba mapang kuli agütsüba maparen nokdangtsü apusoang, ta Trump-i o jembia liasü.

Alima nung COVID-19 agi meneper nisung million 100 jungogo

Aenjeti/January 27, 2021 (Agencies): Alima nung aliba linüktem virus tabu tasenba agi timtema mozü peria monguteti aliba mapang coronavirus cases ya Bodhbarnü million 100 jungogo, ta Reuters ajanga asadangteta lir.

Novel coronavirus agi adokdaktsüba COVID-19 tashidak yagi alima nung nütsüng yongsük shilem 1.3 jungnüa menepogo aser nisung million 2.1 dak tema süogo.

Küm tenzükba sülen second 7.7 shia nisung ka dak iba tashidak yagi meneper. Kasa mapang anogoshi nisung 668,250 shi iba tashidak agi meneper aser alima nung iba virus agi nisung asüba ya shilem 2.15 nung lir.

Tesashitiba kongshiba - United States, India, Brazil, Russia aser United Kingdom - linüktem yagi COVID-19 cases jangjateta aliba ajak senteper tesadang ka dang timba lirsaka nütsüng yongsük bo item linük ya senteper shilem 28 dang lir, ta Reuters ajanga asadangtet.

Alima nung iba tashidak agi nisung million 50 menepba jangjatsü ita 11 agi, aser million 100 ajungtsübo ita asem dang agia liasü.

Linük 56 shi nung



coronavirus atema mozü agütsü tenzükogo aser tajemba agi doses million 64 bo agütsüogo. Per capita vaccination tsütsü alima nung Israel temaba jenjang nung lir, kong nütsüng yongsük shilem 29 nem dose ka bo agütsüogo.

United States ya alima nütsüng yongsük den metemdangra shilem 4 dang lir, saka alima nung tang tashinung COVID-19 cases aliba ya shilem 25 iba linük nungi lir, kong nisung million 25 dak tema iba virus yagi meneper lir. Alima nung nisung asüba tsütsüa United States ya temaba lir, aser alima nung anogoshi nisung pongu asüba nungi ka iba linük nungi lir. United States nung coronavirus agi asür ya nisung

425,000 tajunger, koba Brazil dang anasü agi timba alitsü. Alima nung COVID-19 agi nisung timtiba asüba tsütsü Brazil ya tanabuba jenjang nung lir.

Alima nung iba tashidak agi tamajungtiba kongshiba region ji Europe ya lir, aser tanga yangji anogo pezü nung nisung tasen million ka dak iba tashidak jangjateter aser iba tashidak wara tenzüker nisung million 30 jungnüa menepogo. Mongulbarnü tashinung Britain nung iba virus agi asür nisung 100,000 jungogo.

Russia, Poland aser Ukraine amala linüktem densema Eastern European region ya alima nung COVID-19 cases shilem 10 jungnüa lir.

Mozü alitsü tatem kuma jembiake European linük aika Pfizer Inc aser AstraZeneca Plc nungi mozü bener arutsü menur.

Alima nung COVID-19 cases timtiba rongnung India ya tanabuba jenjang nung lir, aser yangi tashidak menatapa aoba ajema kumogo, kong anogoshi nisung tasen 13,700 jungnüa dak puteter, koba taoba mapang dang putetba den medemdangra shilem 15 shi dang lir. India nung pei sasa yanglutetba coronavirus mozü agi peritsü, ta Ato Kilonser Narendra Modi-i Hokulbarnü ashi, aser hopta ka tsüngta alima nung nütsüng yongsük timtiba rongnung jenjang tanabuba nung aliba linük nungya nisung million ka dak tema nem mozü agütsüogo.

Alima nung coronavirus lockdown mezüngbuba ya China tiyonglen Wuhan yimti nung benoker tawa küm ka jungogo, aser yangji taoba küm March ita nungi local cases tamajungtiba ajangshia arur.

Takatait linüktem nung nübur ajunga nem iba virus mozü agütsütsü arrsangtepba mapang Africa nungbo tang tashi iba mozü alitsü asoshia timtem ajurua lir, kong tali menatapa aoba virus tabu tasenba atema

shisabulur, koba South Africa aser Britain nung mezüng jangjatet.

Africa linüktem nung nisung million 3.5 jungnüa COVID-19 agi menepa lir aser nisung 85,000 dak tema süogo, ta Reuters ajanga asadangteta lir.

South Africa nung poktetba virus tabu tasenba, koba dang 501Y.V2 ta ajar, ibai nisung dak menatapa aotsü shilem 50 agi temelaba lir aser linük 20 shi nung jangjatetogo.

COVID-19 tabu tasenba prokshia aoba azüoktsü mechi US Tir Joe Biden-i US senso masüba nüburtem tawa South Africa-i odanger alirtem linüki aitba Honibarnü nungi nokdangtsü.

Artsü shibangba, lockdown, senzusempongertem hotel nung kanga junga quarantine asüba aser kanga junga tendanga social distancing yimyatem amshiba ajanga Australia aser New Zealand nungbo iba tashidak kanga junga azüokteta lir.

"Australia nung onoki virus kanga junga azüokteta lir, saka onoki mozü agütsüner," ta Australian Treasurer Josh Frydenberg-i Deobarnü osangbener senden ka nung ashi.

Imcha Imchen indang ken Apple's Top 2020 Hits nung züngoksem



Dimapur, Aenjeti/January 27 (TYO): Naga nunger pop kentener Imcha Imchen indang ken 'Spare My Heart', Apple Music indang 'The 100 Best Songs of 2020' nung

züngoksemogo. Iba list nung nüngtugu kentener Billie Eilish aser Ariana Grande nungeri atenba kena densema lir. Tang mezügbuba Naga nunger

Naga nunger entrepreneur kati dim makümba LED light yanglu

Dimapur, Aenjeti/January 27 (TYO): Arishi küm 33 tain I. Sodangsoba Jamir, taoba küm June ita Covid-19 tashidak poktetba ajanga Delhi nungi Nagaland-i meyipa arutsüsa akümba sülen state nung voltage fluctuation ya maneni tebilemtü tulu ka ta yimdangi aru. Pa linük yimtiba nung küm 15 tashi marketing sector nung inyaka liasü, saka linük

mokdanga ayuba ajanga kidangi meyipa aotsüsa aküm. Pai kinük nung aliba district nung alirtem atema bilem tenzüc aser talisa Nagaland nung voltages fluctuations ajanga timtemba indang bilema liasü. Normal voltage ya yimya agi 220-240 volt asür, saka Dimapur nung voltage ya normal dang nungi tajemba ta ngutetba pai Morung Express

den lemsatep. Ao yimti nung par kidang voltage 183 dang angur koba kanga ajemer, ta pai ashi. Iba ajanga pai voltage fluctuations tizükba LED lights yanglutsü atema asatet. "Iba tetezü light dim makümtsü," ta Jamir-i ashi. Light tem ya brand tenüng 'sangwa' ta nüngja agütsür yokdar, koba Ao oshi nung 'light' tetezü lir.

Qualcomm Snapdragon 870 aketba Motorola Edge S sayaogo

Aenjeti/January 27, 2021 (Agencies): Motorola-i Edge-series nung Motorola Edge S sayaogo. Iba smartphone tasenba nung tang mezügbuba Qualcomm Snapdragon 870 processor inokja aliba angutsü koba Snapdragon 888 SoC aser Snapdragon 865 Plus SoC yongtsü nung lir. Motorola Edge S indang tesülen camera module design ya Motorola Edge S aser Edge Plus nung keta aliba module dang nungi balaka asütsü. Tanga tongtumbang feature tem rongnung dual selfie camera, 90Hz display aser 5,000mAh battery densema lir. Motorola Edge S ya China nungbo ngudar aser Lenovo meyong iba phone yangluba company yagi alima ajunga nung kodang sayatsü iba indang osang tejanga agüja mali. Phon jenjang ya 6GB + 128GB storage variant atema CNY 1,999 (approx Rs 22,600) aser 8GB + 128GB

storage option atema CNY 2,799 (approx Rs 31,600) asütsü. China nung customer temi iba phone ya Emerald Light aser Snow-Mist sentsü nung February 3 nü nungi tenzüka Lenovo offline aser online channel ajanga alia amshitetsü. Iba phone ya jelia mekazüka ayutsü atema lapoktsüogo. Design dak sendakba nung Motorola Edge S nung 6.7-inch full-HD+ (1,080x2,520 pixels) display den 21:9 aspect ratio, 90Hz refresh rate, aser HDR10 support keta lir. Phone nung tesülen camera module ya square-shape asütsü kong camera tem aser LED flash keta lir. Kasa mapang nung Edge S nung octa-core Qualcomm Snapdragon 870 SoC, den Adreno 650 GPU aser LPDDR5 RAM 8GB keta lir. Phone nung OS ji Android 11 den MyUI asütsü aser dual-SIM card

support asütsü. Tesülen camera nung 64-megapixel primary camera den f/1.7 aperture, 16-megapixel ultra-wide-angle camera ka den 120-degree field-of-view (FoV), aser 2-megapixel depth sensor ka inokja lir. Ano iba den 3D imaging aser AR experience tajungba kümdaktsütsü atema time-of-flight (ToF) sensor inokja lir. Motorola Edge S nung selfie atema 16-megapixel primary sensor ka aser 8-megapixel secondary sensor ka inokja aliba angutsü. Tanga tongtumbang features tem rongnung 256GB of UFS 3.1 storage, 5G, 4G LTE, Wi-Fi 6, Bluetooth 5.1, GPS/ A-GPS, aser NFC densema lir. Maneni phone nem 5,000mAh battery ka ajanga tashi agütsütsü aser iba yagi 20W fast charging dena support asütsü. Motorola Edge S nung 3.5mm headphone jack ka dena angutsü.

Kendrick Lamar-i ken tasen ka yakta sayatsü



New York, Aenjeti/January 27, 2021 (Agencies): Nüngtugu rapper Kendrick Lamar-i ken tasen ka sayatsü ternemba lir. Grammy takok angusang rap star Lamar-i 2017 küm 'Damn' sayaba sülen nungi pai studio kensep ka danga sayaa mali, saka Top Dawg Entertainment president Punch-i ashiba agi, fans temi pa indang ken tasen yakta angashitsü akok.

Twitter nung podcast host Karen Civil-i la indang 'Girl I Guess' podcast nung Punch jaoka sentong agiba mapang, pai iba osang ya agütsü. 'Humble' rapper indang fans tem dang Lamar den mapang talangka engineer inyaksang Derek 'MixedByAli' Ali-i teaser ka lemsatepba sülen, Lamar-i ken tasen sayatsü osang ya arur. Ali-i ashiba agi, arishi küm 33 tain

Lamar-i kensep trok atema ken tasen peria record süogo. "Kendrick-i kensep trok atema ken tasen peria yanglua lir ama ni asadangteter," ta November 2020 nung Ali-i ashi. "Kendrick-i tajungba atema teti meranga inyaker. Ken tasen ka süshia mesüra kensep tasen süshia, pai bendanga agütsür inyaker. Pa ya sempet tajung aketba artist ka lir," ta pai ashi. Iba kensep sayaba dak alaka, Kendrick-i Denmark nung Roskilde Festival aser Ireland nung Longitude densema festival sentong balala nung shilem agitsü terenemba lir. Maneni, Lamar-isa 2020 Glastonbury nung shilem agitsü renemer liasü, saka COVID-19 wara mejungi akümba ajanga iba sentong ya taoba küm athiba den külemi 2021 festival tasüsa thitsüogo.

Mulungnen O



ASO :
15/04/1937

ASÜ :
19/01/2021

Onoki teti meima aliba Obala asür **PUTUSUWA JAMIR** G.B (Longmisa), temang manemi aliba mapang nungi akümüli wadang tembangba anogo aser lepkhumong anogotem ajak nung ozü mulung zürep mangyim tia nung alidang shirnokisa nübu, rongsen aser sarasadem agi yaritepogo, nenok ajak dang kanga pelaba lemsateper.

Talisa onoki item dang kanga balaka pelaba shisemer :

1. Longmisa Village Council
 2. Longmisa Baptist Arogo
 3. Chungtiayimsen Baptist Arogo, Arogo kongsang balala, Village Council
 4. Ao Baptist Fellowship Kohima Science College
 5. Kelingmen Baptist Arogo
 6. Doctor & Nurses, Lenjem Hospital Mkg
 7. Ongpangkong Range G.B Union
 8. S.Chuba Lkr Ex. MLA
- Tsüngremi nenok temeim mapa meyipa moajangma.

Temeim Chirnur, Semchirseemnur aser Kinungertem

OFFICE OF THE MONGSENYIMTI BAPTIST AROGO YIMKONG DANG PELAR

"Tang nungi shirnok Kibuba nung asü parnok tepelatsü" J.Adok. 14:13



Samar aliba santem anidena anepalutsü Kibubai mezüshia jatetba tapayutsü tebenjem lenir aser yimkongi sakloka aliba Mongsenyimti Baptist Arogo Sannüker Wb. Imli Ozüküm anojungi January 10, 2021 anogo iba akümüli wadang tembanger Arogopurtem shisatsü koremseta mulungzürepa alidang Aoli-sanger tamang Mongchen Tebuti ABAM-i anir Arogotem, Tembartem aser Adianutem shirnokisa temeim sobutsü sobur ozü Arogo sangertem den tanela aser alima shisatsü nung tesünep agüja onok mulung anisüngzükdaktsüogo nenok inti dang onsara pelaba Tsüngrem tenüng sanga iba zülü ajanga lemsateper.

Nenok senti mapa tulu teyanglur Tsüngremi shilua talubosa Pa wadang asoshi moajangma ta ozü Arogopur tamang sarasadem.

Sd/-
L. Amenla Pongen
Pastor In-charge, MBA

Sd/-
Wati Ozüküm
Acnt. Cum Clerk, MBA

-- **FOR SALE** --

Plots of land with plantation in Tuli
Contact : 7005570366

NCC Cadets temi Republic Day nung shilem agi

Kohima, Aenjeti/January 27 (TYO): NCC Group Headquarters office aser staff tem matsüngdang linük wako salatsü aser iba sülen Group Headquarters Kohima nung linük naklo ken aten. Iba sülen Raj Bhavan, Kohima nung ayongzüka agiba State sorkar sentong nung Group Commander aden, ta PRO (Def) Kohima Lt Col Sumit K Sharma-i sangdong ka ajanga metetdaksü. Group Commander, Brig K

Chelsea manager asütsü Thomas Tuchel shimogo

Aenjeti/January 27, 2021

(Agencies): Frank Lampard melena Chelsea coach asütsü Thomas Tuchel shimba club sangdong ka ajanga Mongolbarnü metetdaksü.

Arishi küm 47 tain taoba mapang Borussia Dortmund aser Paris St Germain coach den ita 18 atema tenangzüktepba yangluogo aser ano küm ka atsülangtsü atema lenmang lapoka yuogo, ta club-isa metetdaksü.

"Chelsea FC-i ni aser kü staff dak tamang akaba atema pelar," ta Tuchel-i ashi. Pai Chelsea indang Cobham training headquarters nung asayartem den ajurutepogo.

"Onok ajaki Frank Lampard mapa aser pai Chelsea nung tenüng tajung toktsüba akhümtsübur.

"Kasa mapang nung ni team tasen den ajurutepa football league ajak dang tajungtiba nung tokteptsü matateter. Ni Chelsea kibong nung densemba atema kanga pelar aser jangradema bilemer," ta pai ashi.

Lampard shiba Chelsea nung goal timtiba idaktsüba asayar lir, pa lenisüba kübok asaya ti nung pongu makokba



sülen ita 18 lir pa Hombarnü mapang nung anentsü.

Arishi küm 42 tain Lampard ya Chelsea fans temi kanga saklokba nisung ka aser 2019 küm July ita club nung arua adenba sülen academy graduates asayar ti nem first-team nung asayatsü maongka agütsüba atema pa tenüngsanga aruogo.

Ajisüaka manager ama pa tajangshiba aikabo mali kechiyong pa Maurizio Sarri melena Stamford Bridge-i maru tsüngda second-tier Derby County dang season ka anepaludanga liasü.

Chelsea pusemertem atema Tuchel ya nisung tasen, ajisüaka pai PSG team kanga takok ngua len anio. Pa lenisüba kübok PSG-i French league title

anaben atonga akok aser taoba season Champions League final tonga ani, ajisüaka pa December ita mapa nungi anentsü aser Mauricio Pochettino-i melen.

"Season tom nung coach melentsü ya temela masü, saka Europe nung coach tajungtiba rongnung züngoksema alisang Thomas Tuchel ngutetba atema pelar," ta Chelsea director Marina Granovskaia-i ashi. "Iba season aser tarutsü nung ano asaya aika aser takoka jangzüksü aika anunga lir. Onoki Thomas club-i pelashishia agizüker.

Tuchel ya Chelsea nung mezüngbuba German coach asütsü aser pai Juergen Klopp nungi Mainz coach mapa belenzükba sülen par team 2010-11 nung Bundesliga nung jenjang pongububa tonga aniba sülen ajaki pa ya matalok tsüngda jelia tasa tajung asaba coach ka ta jangjaa aküm.

2014-15 season tembangba den Klopp-i Dortmund toktsüba sülen Tuchel-i ano pa melenzük aser pai iba club 2017 küm takok dangi ani.

Iba sülen pa 2018 küm Unai Emery melena PSG-i ao.

Sourav Ganguly tanaben mozüki anirogo



Aenjeti/January 27, 2021

(Agencies): BCCI tir aser taoba India cricket team captain Sourav Ganguly Bodhbar anepdang tanaben mozükidangi anirogo. Pa tekü nung tashiba ka adokba sülen mozüki-i anir ao, ta par kinungertemi metetdaksü.

Osang ajanga angazükba agi, yashi nikongtsütsü nungi Ganguly minpronga liasü aser tanep teku nung tashiba tera adok aser iba sülen par kinungertemi pa Apollo Hospital-i anir aotsü telemetba agi. Pa tema tajungba lir ta angazükogo.

Iba ita tetenzüklen mild heart attack ka asüba sülen Ganguly Woodlands Hospital nung coronary artery tachichilen angioplasty agi. Pa anogo ishika

lir mozüki nungi yok saka doctor-i pa dang coronary arteries tabelen lena angioplasty agitsü ajungshia liasü.

PTI sangdong ka ajanga ashiba agi, Kolkata Police-i pa mozükidangi kecha tetsükdaksü makai aotsü atema lenmang mesapokja liasü, ta mozüki ketdangsertemi ashi.

Iba ita tetenzüklen Ganguly-i par kidang exercise agiba mapang teku nung tashiba ka aliba ashishia liasü.

Pa tema anepalutsü atema nisung teku shim aser India nungi Devi Shetty, R K Panda, Samuel Mathew aser Aswin Mehta aser New York nungi Shamin K Sharma nunger amala cardiac surgeons tem nungi shisatsü agiba sülen stent ka implant sütsü.

ICC player of month awards atema Ashwin & Pant shim

Dubai, Aenjeti/January 27

(Agencies): India nunger asayar tejen R Ashwin aser wicketkeeper-batsman Rishabh Pant na Bodhbarnü, tawa International Cricket Council-i amenokba player of the month awards atema züngoksemogo.

Ashwin aser Pant na dak alia ano India nunger asayar Mohammed Siraj aser T Natarajan nata züngoksemogo. Parnok ajaki Australia den asaya nung kanga junga asayaogo.

ICC-i ashiba agi, iba award ajanga küm tepeyong cricket asaya yimya balala nung tetsür aser tebur asayar tajungtibatem tushitsü.

January ita award atema shimba asayartem rongnung England captain Joe Root, Australia nunger batsman Steve Smith, Afghanistan nunger asayar Rahmanullah Gurbaz, South Africa nunger asayar

Marizanne Kapp aser Nadine de Klerk na aser Pakistan nunger asayar Nida Dar densema lir.

Ita ka tsüngda international cricket format balala asayaba nung tetsür aser tebur asayar tajungtiba shimtsü atema ita shia vote agütsütsü asoshi fan tem jaoker, ta ICC-i sangdong ka ajanga metetdaksü.

Takoker shimtsü atema fan tem den külemi alima ajunga nungi taoba mapang asayartem, broadcasters aser osangbenertem densema aliba independent ICC Voting Academy kati vote asütsü.

ICC General Manager - Cricket, Geoff Allardice-i, "ICC Player of the Month ya fan tem den sendakteptsü aser küm tepeyong parnoki saklokba asayartem shima benjungteptsü atema kanga tajung asütsü," ta ashi.

"Iba ya asenok ajak atema

tetsür aser tebur asayar tajungtibatem tushitsü asoshi maongka tajung ka asütsü aser January ita asayar aikati kanga junga asayaba ajangshiogo," ta paisa ashi.

Category ajak atema asayar asemsem shimba ya ICC Awards Nominations Committee-i parnok asayaba yimya aser ita ka (mezüng anogo nungi tatemnü tashi) tsüngda parnoki ajangzüktetbatem apir shimtsü.

Voting Academy-i parnok indang vote tem email ajanga yoktsü aser parnok shilem 90 asütsü. Maneni ICC nung züngoksema aliba fan temi ita shia mezüngbuba anogo ICC website ajanga vote agütsütsü aser parnok shilem 10 asütsü.

Takokertem ita shia tanabuba hopta Hombarnü ICC indang digital channels ajanga sangdongtsü.



18buba National Federation Cup Junior U20 Champion Bhopal nung asayaba mapang west Bengal nungi asayar Ujala Kumari Singh-i Junior girls 19-20 Javelin Throw final nung nü atsüba noksa nung angur.

IPL auction Chennai nung Feb. 18 nü agitsü

New Delhi, Aenjeti/January

27 (Agenceis): 2021 season metenzük tsüngda IPL players' auction Chennai nung Febriary 18 nü agitsü, ta asayamung ayongertemi Bodhbarnü metetdaksü.

PTI-i IPL auction agitsüba anogo sangdongba sülen hopta ka shidak lir iba osang IPL Twitter handle ajanga metetdaksüogo.

"IPL 2021 Player Auction February 18 nü agitsü," ta post shilem ka nung shia lir.

Chennai nung India aser England na tsüngda mezüngbuba test ana tembangba sülen "mini auction" agitsü. Asayamung ya February 5 nü tenzüksü aser tanabuba test February 13 nungi 17 tashi asayatsü.

Kasa mapang nung taküm IPL India nung asayatsü asü masayatsü iba indang BCCI-i tang tashi telemetba agia mali, ajisüaka board tir Sourav Ganguly-i, iba asayamung kidang kechi südir süaka asayatsü atema takok tashi inyaksü, ta aiben shia aruogo.

COVID-19 wara poktetba ajanga 2020 küm iba asayamung September-

November nung UAE nung asayaa liasü.

Taruba ita nungi tenzüka India nung England den asaya takok ngua asayatetba ajanga league kidang asayatsü atema lenmang lapoktsütsü.

Asayartem auction-i meyoki club nung tanaben züngoksemtsü atema tatembangbuba anogo January 20 nü tembangogo aser trading window February 4 nü tembangtsü.

Australia nunger nüngtugu asayar Steve Smith aser Glenn Maxwell na Rajasthan Royals aser Kings XI Punjab-i toktsüogo.

Nüngtugu asayartem rongnung Chris Morris, Harbhajan Singh aser Aaron Finch nungera parnok asayaa aliba club temi toktsüogo. Ajak senteper asayar 139 meyipa agiogo aser asayar 57 chiokogo.

Kings XI Punjab pur sen crore 53.20 bener auction-i aitsü aser Royal Challengers Bangalore pur sen crore 35.90 aser Rajasthan Royals pur sen crore 34.85 bener aitsü.

Kolkata Knight Riders aser Sunrisers Hyderabad na sen crore 10.75 bener auction-i aitsü.

BILEMDANGANG

"Timla samara shisa ramatsü."